

Konvensaun Halakon Forma Hotu-Hotu Diskriminasaun Hasoru Feto (CEDAW)

Diskursu husi Sekretaria Estadu ba Promosaun Igualdade iha abertura

Treinamentu CEDAW bá Parlamentu Nasionál

Díli, 2 Outubru 2008

S.E. Presidente Parlamentu Nasionál, Sr. Fernando Lasama de Araújo

S.E. Vise Presidente Parlamentu Nasionál ne'ebé kaer Pasta hanesan Presidente Grupo das Mulheres Parlamentar de Timor-Leste (GMPTL)

Distintu Deputadu sira

Reprezentante Sosiedade Sivíl no Média

Ilustre Konvidadu mak hau respeita

Ohin hanesan previléjiu bo'ot tebes no oportunidade di'ak bá ita tomak atu halibur malu iha fatin plenária ida ne'e hodi tuir formasaun kona-ba konvensaun CEDAW.

CEDAW katak sa? CEDAW katak **Konvensaun Halakon Forma Hotu-Hotu Diskriminasaun Hasoru Feto** ne'ebé ratifika tiha ona iha 2003 husi Parlamentu Nasionál, depois konvensaun ne'e ratifika Governu Timor-Leste preziza halo konsultasaun ho entidade oin-oin, hodi rona sira nia hanoin kona-ba konvensaun ne'e. Timor-Leste consegue prepara tiha ona Relatóriu Inisiál.

Timor-Leste tarde ona tanba tuir lolos tenke hato'o Relatóriu iha tinan 2004 maibé tanba problema oin-oin ne'ebé nasaun ne'e enfrenta hodi nune'e atraza tiha apresentasaun ne'e.

Relatóriu CEDAW apresenta tiha iha Konsellu Ministru no hetan aprovasaun iha 9 de Janeiro 2008. Relatóriu ne'e kobre husi periode 20 de Maiu 2002 to'o 19 de Maiu 2006.

Relatóriu CEDAW ne'e mak hatudu mai ita hodi haré no kompriende kona-ba situasaun feto jeralmente iha Timor-Leste liu-liu sira nia moris, sira nia preziza, sira nia difikuldade ne'ebé sira enfrenta iha sira nia moris loron-loron. Alénde Relatóriu CEDAW iha mós Relatóriu "Sombra" apresenta husi sosiedade sivíl baséia bá Relatóriu Governu nian ka sira bele hili relatóriu alternativa hodi nune'e bele haluan liu-tan sira nia analiza ho liberdade husi sira nia perspetiva rasik.

Labarik feto no feto sira sei enfrenta difikuldade iha asesu edukasaun, saúde, ekonomía iha vida política no sosiál iha família laran ne'ebé afeta bá sira nia vida loron-loron.

Feto nia knaar importante bá desenvolvimentu nasional hanesan parseiru mane nian maibé tenke haré bá rekoñesimentu no valorizasaun feto nia direitu no feto sira nia kontributu bá desenvolvimentu. Feto sira representa 50% hosi populasaun, husi rekursu iha ita nia nasaun. Tanba ne'e hanesan investimentu bo'ot bá nasaun e feto mós la bele servisu mesak ho ita ninia grupu ki'ik oan ida, maibé tenke servisu hamutuk ho mane sira atu nune'e bele hatán bá nesesidade feto ho mane nian hanesan hakerek iha Konstitusaun RDTL.

Governu asume kompromisu legal ida atu kontinua ativu liu husi meu adekuaudu iha política hodi halakon diskriminasaun hotu-hotu hasoru feto, iha vida pública no privada, inklui mós vida política, lejislativa, servisu, edukasaun, saúde, rai no propriedade no direitu bá nasionalidade.

Iha oportunidade ne'e hakarak atu informa katak fulan Jullu 2009, Timor-Leste hetan oportunidade atu halo apresentasaun bá Relatóriu Inisiál iha Jenébra bá Comité CEDAW nian kona-ba situasaun feto Timor-Leste nian hodi hatene feto nian progresu to'o iha ne'ebé ona. Governu komprometidu tanba re-establese grupu traballu kona-ba CEDAW nian ne'ebé involve Ministériu sira hotu atu bele hadi'ak sira nia kapasidade monitorizasaun hodi suporta política kona-ba abordajen integradu jéneru.

Iha tinan 2005, índise desenvolvimentu jéneru estima tiha ona katak Timor-Leste hetan .4222 (0, rihun ha'at atus rua, rua nulu resin rua) ne'ebé tama iha pozisaun 124-125, (atus ida rua nule resin hat to'o atu ida rua nulu resin lima) hatudu katak igualdade de jéneru promove kresimentu ekonómiku bá desenvolvimentu sosiál no kontribui bá política ne'ebé eficiente.

IV Governu Konstitusionál adopta política kona-ba Abordajen Integradu Jéneru hanesan dalan

ida atu hatun pobreza. Asumi kompromisu atu investe bá labarik no fetu atu hetan igualdade. Importante liu bá membru Parlamentu Nasionál atu uza CEDAW hanesan ferramentu bá lei sira atu bele promove direitu fetu.

Hanesan ita hotu hatene katak kódigu penál hetan tiha ona aprovasaun husi Paralamentu Nasionál no fó autorizasaun lejislatíva bá Governu atu bele halo lei. Lei ida ne'e iha ligasaun ho Lei Violénsia Doméstika tanba ne'e hau espera katak Parlamentu sei aprova Lei Violénsia Doméstika tanba fetu no labarik sira barak mak terus no la hetan protesau husi família no mós comunidade, vítima barak tebes maka hein hela wainhira los maka Lei Violénsia Doméstika ne'e bele hetan aprovasaun lalais hodi proteje sira nia direitu. SEPI estabeselese mekanizmu koordinasaun ho grupu oin-oin inklui Grupo das Mulheres Parlamentar de Timor-Leste (GMPTL) hanesan estratéjia atu hametin koordinasaun liu-liu atu haré bá lei hirak ne'ebé sei debate iha uma fukun ida ne'e hodi halo analiza profundo bá perspetiva Governu.

Ikus liu hau nia parabéns bá ekipa hirak ne'ebé involve iha preparasaun treinamentu ida ne'e, partikularmente bá GMPTL, bá organizaun Caucus Fetu iha Politika, UNIFEM, no institusaun seluk ne'ebé servisu maka'as hodi realiza treinamentu ne'e. Espera katak treinamentu ida ne'e bele lao di'ak no bele aumenta ilustre deputadu sira nia koñesimentu no implementasaun kona-ba Konvensaun CEDAW hodi nune'e bele iha mekanizmu kolaborasaun no kooperasaun di'ak bá futuru.

Obrigada no susesu bá ita hotu.